

Visoki predstavnik poduzeo mjere kako bi oslabio mrežu koja pruža pomoć Karadžiću

Visoki predstavnik Paddy Ashdown u petak je pokrenuo kampanju u cilju slabljenja mreže koja proteklih sedam godina omogućava optuženom ratnom zločincu, Radovnu Karadžiću, da izbjegava uhićenje.

Nakon donošenja izmjena i dopuna bankarskih zakona na državnoj i entitetskoj razini u cilju omogućavanja Agencijama za bankarstvo da blokiraju sredstva i zabrane daljnje transakcije pojedinaca i poduzeća koji opstruiraju Daytonski mirovni sporazum, Visoki je predstavnik ustanovio da Momčilo Mandić i Milovan Bjelica te dva poduzeća Manco Oil i Privredna banka Srpsko Sarajevo vrše opstrukcije.

Banke sada imaju zakonsku obvezu osiguravati zamrzavanje bankovnih računa ove dvije osobe i ovih poduzeća. Moguće kaznene mjere protiv banaka koje ne budu poštivale ovu obvezu uključuju i ukidanje dozvole za rad.

“Danas je međunarodna zajednica proglasila Momčila Mandića i Milovana Bjelicu osobama koje su prekršile financijska pravila zbog toga što su djelovali kao pomagači Radovana Karadžića i što su ometali izvršenje pravde” rekao je Visoki predstavnik na konferenciji za novinare. Visoki je predstavnik rekao da je Mandić, poznati ratni profiter, financirao Karadžića, dok je Bjelica koji je povezan s trgovinom oružjem, švercom i iznuđivanjem, djelovao kao Karadžićev posrednik s vanjskim svijetom. U zasebnoj Odluci koja je izdana u petak, Visoki je predstavnik smijenio Bjelicu s funkcije predsjedavajućeg Skupštine općine Srpsko Sarajevo.

Od danas će svi bankovni računi koji se vode na ime ovih osoba i poduzeća biti zamrznuti i prebačeni u Centralnu banku. Ove

osobe i poduzeća neće moći otvoriti nove bankovne račune niti izvršiti bilo kakvu bankovnu transakciju u Bosni i Hercegovini. Ove osobe i poduzeća više u svoje ime ne mogu ni poslovati u BiH. Sve osobe koje obavljaju transakcije u njihovo ime će također biti na spisku osoba protiv kojih će se poduzeti mjere.

Visoki je predstavnik napomenuo da je mreža koja pruža potporu Karadžiću "na različite načine uzimala novac od građana Republike Srpske a osobito putem kriminalnih radnji, korupcije u javnim poduzećima i utaje poreza." Visoki je predstavnik rekao da aktivnosti ove mreže onemogućavaju zadovoljenje pravde za građane BiH, a Bosna i Hercegovina je i dalje njihov taoc.

"Da bi pravda bila zadovoljena, Karadžić mora otići u Hag", rekao je Visoki predstavnik. "Karadžić mora otići u Hag ukoliko Republika Srpska želi da odbaci svoju međunarodnu reputaciju utočišta za ratne zločince i organizirani kriminal – reputaciju koja je do sada odbijala ulagače i onemogućavala otvaranje novih radnih mjesta koja su prijeko potrebna Republici Srpskoj."

On je ljude oko Karadžića opisao kao "prokletstvo" nad Republikom Srpskom. "Oni su svojim aktivnostima zapravo dva puta opljačkali građane Republike Srpske. Prvo, putem svojih kriminalnih radnji, a drugi put time što su onemogućili ulaganja u RS koja su potrebna za otvaranje novih radnih mjesta i osiguranje boljitka."

Visoki je predstavnik rekao da inicijativa koja je pokrenuta u petak nema za cilj utvrđivanje krivične odgovornosti. "O tome će odlučivati sudovi", rekao je Visoki predstavnik. "Ove aktivnosti imaju za cilj da na vrlo očevidan i praktičan način razbiju mrežu koja pruža potporu Karadžiću. Ukoliko želite uništiti takvu otrovnu biljku morate je iščupati iz korijena. Ove aktivnosti imaju za cilj da Karadžiću otežaju skrivanje i bijeg. Ove aktivnosti također predstavljaju i upozorenje. Upozorenje svima onima koji također pomažu Karadžiću da ostane

na slobodi. Ovo je početak, a ne kraj procesa. Ukoliko ste dio mreže koja pomaže Karadžiću počnite razmatrati opcije koje su vam na raspolaganju. Odmah odlučite da više ne budete dio te mreže, ili ćete se kasnije morati suočiti s posljedicama.”